

Date – 25/01/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan ruihhlo chu hnam hmelma lian ber a nih angin a do kawngah pawh Sawrkar leh khawtlang tanrual a pawimawh thu a sawi.
2. Mizoram Presbyterian Kohhran te chuan Pastor bial hrang hrangah KTP Conference an hmang mek a, vawiin hian hman chhunzawm leh a ni ang.
3. Republic Day vawi 77-na chu India ram hmun dang rualin naktuk January ni 26 hian Aizawlah pawh Lammualah lawmna hun hman a ni dawn a. Mizoram Larsap Gen VK Singh (Retd) chu he hunah hian khuallian a ni ang.
4. Prime Minister Narendra Modi chuan ram chung leh ram pawna thalaite tan sorkarin theihtawp a chhuah thu a sawi.

<><><>

CM

Chief Minister Pu Lalduhoma chuan ruihhlo chu hnam hmelma lian ber a nih angin a do kawngah pawh Sawrkar leh khawtlang tanrual a pawimawh thu a sawi.

Nimin khan Chief Minister Office-ah Mizorama ruihhlo dona kalpui dan thlirletna hun leh kalpui chhunzawm dan tur relin thutkhawmna neih a ni a. Pu Lalduhoma chuan, Mizorama ruihhlo lo lut te dan chah a nih theih nan Home Department, Excise & Narcotics leh Central YMA-te tangkawp chuan, nikum September ni 1 khan ramri hrul khaw 22-ah Operation Jerico kalpui a nih thu a sawi a. Nikum September ni 1 leh kumin January ni 13 chhunga ruihhlo man tawh zat hlut zawng chu Cheng Vaibelchhe 196.42 man a nih thu a sawi bawh a ni.

Chief Minister chuan Excise & Narcotics Department-a thawktute indaihna puhruk nan Post 16 siam thar a nih thu sawiin Direct recruitment hmangin mi 28 lak an nih tawh bakah mi 39 la leh turin inbuatsaihna a kal mek thu a sawi a. Kum 2025 chhung khan ruih theih thil chi hrang hrang kaihnawih ah case 319 ziah luh a nih thu a sawi.

Home Minister Pu K.Sapdanga pawhin thu sawiin, ruihhlo do kawnga Excise & Narcotics Department tha tichak tura Home Department bakah Central YMA tha thawhna chuan awmzia a neih thui hle thu a sawi a. Aizawl mai bakah District hrang hranga ruihhlo tih remna tura Sawrkar an thawhpui thinna ah lawmthu a sawi bawk a ni.

Excise Minister Pu Lalnghinglova Hmar leh CYMA General Secretary Prof. Malsawmliana te pawhin thu an sawi a. Thutkhawmah hian ruihhlo ngaite enkawl a, eizawna tlak thiamna an neih theihna turin Home awmsa thenkhat thawmthat dan turte sawi ho a ni a. Ramri hrul, ruihhlo luh tamna hmun a ngaih ahte Outpost siam belh dan tur rel bawk a ni.

<><><>

KTP BIAL CONFERENCE

Mizoram Presbyterian Kohhran te chuan Pastor bial hrang hrangah KTP Conference an hmang mek a, vawiin hian hman chhunzawm leh a ni ang.

Zirtawpni zan khan tan niin Palai lawmna leh report inkhawm niin, nimin khan Rorel leh hruaitu thar thlan a ni a, nizan atanga khan Pathian biak inkhawm awm chhunzawmin Kohhran zaipawl ten hla an rem bawk a ni.

Bial Conference hman dan tur hi Bial committee-in ngaihtuahin a remchan dan anga hman thin a ni a, churang chuan bial hrang hranga conference hman dan pawh a inang vek lo a, Bial thenkhatah thupui thlan bik neiin speaker ten an sawi thin a, bial thenkhatah chuan thupui thlan bik pawh nei lovin bial hruaituten an in sawi chhawk chang pawh a awm thin a ni.

Central KTP hruaitute pawh Bial KTP Conference hmanpui turin Bial hrang hrangah an kal a ni. Report hnukung bera a lan danin tun dinhmunah Bial 223 awmin Branch 907 a awm mek a, KTP member 1,77,548 (mipa 1,07535 leh hmeichhia 70,013) an awm mek a ni.

<><><>

REPUBLIC DAY

Republic Day vawi 77-na chu India ram hmun dang rualin naktuk January ni 26 hian Aizawlah pawh Lammualah lawmna hun hman a ni dawn a. Mizoram Larsap Gen VK Singh (Retd) chu he hunah hian khuallian a ni ang.

Sorkar thu chhuah tarlan dan chuan, Lammual-a Republic Day lawmna hi zing dar 9 ah tan a ni ang a Khuallian chuan Hnam Puanzar a pawhparh hnuah Parade Contingent enfiahna neiin, Republic Day pual lawmna March-Past in a chhunzawm ang. Governor hnen atang hian Republic Day thuchah ngaihthlak a ni ang a. National/State Awards leh lawmman dangte semina a chhunzawm ang.

Mizoram sorkar chuan, khua leh tui te tana ni pawimawh tak Republic Day lawmnaah hian mipui a tam thei ang ber tel turin an sawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DRUGS

Special Narcotics Operation Squad, Kolasib Police te chuan nimin zing khan sahbawn bawm pali a dah Ruihhlo leh a neitu a puh Niangneihhoihi (kum 42), Electric Veng, Kolasib a cheng an man a, Ruihhlo rih zawng hi Gram 49.05 niin, tualchhung rate ah cheng 1,47,150/- man hu ni a chhut a ni.

Ruihhlo neitu a puh hi Kolasib Police Station ah Case siam sak a ni a, nimin vek khan Kolasib District Court-ah hruai a nih hnu in District Jail-ah dah luh nghal a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 130-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>

ROZGAR MELA

Nimin khan Rozgar Mela chu Gajraj Hall, Lammual-ah neih niin Mizoram atangin mi 40-in appointment letter an dawng a ni.

Rozgar Mela hi India hmun hrang hrang 45-ah nei niin thalai mi 61,000 chuang hnenah hna laktharna lehkha hi pekchhuah a ni a. Mizorama hun hmanah hian Brig. Pushendar Sorayan, DIG Headquarters 23rd Sector Assam Rifleschuan thu sawiin, rilru hrisel leh fim tak put a pawimawhzia leh, thalaite chu ram hmalam hun hruaitu tur an nih thu a sawi a. Hna thar hmutu te chu lawmpuina hlanin, hetiang dinhmun an thlen theihna chhan hi an nu leh pate avang a nihzia hre reng turin a chah a ni. Prime Minister Modi hmalakna

avangin ram chung hmun 45-ah he Rozgar Mela hi neih a ni thei tih sawiin, thalaite chu rinawm leh taima taka thawk turin a chah a. Brig. Pushpendar hian DIG BSF leh officer dang lo tel te chungah lawmthu a sawi bawk a ni.

Mizoram atanga thlan mi 40 appointment letter dawngte chu Assam Rifle, BSF, CRPF leh CISF-ah te an dah an ni.

<><><>

Rozgar Mela

Prime Minister Narendra Modi chuan ram chung leh ram pawna thalaite tan sorkarin theihtawp a chhuah thu a sawi a. India chuan ram eng emaw zat nen insumdawn tawna tur leh inkalpawh theihna tur thuthlung a ziak nual a, hei hian ram chungah thalai mithiam tak takte tan hun remchang a hawng dawn a ni, a ti. 18th National Rozgar Mela puala thu a sawinaah he thu hi a sawi a ni.

India ram economy nghet thu sawiin PM Modi chuan khawvela kum sawm chungah GDP a let hnih a tipung thei awmchhun a nih thu a sawi. Ram 100 chuangin Foreign Direct Investment (FDI) hmangin India ramah investment an nei mek tih a sawi a, kum 2014 hma kum sawm nena khaikhin chuan FDI lut chu a let hnih leh chanve chuang zetin a pung tih a sawi bawk.

Rozgar Mela chu institution-ah a chang tawh a, tun thlengin sorkar department hrang hrang atangin thalai nuai tam takin appointment letter an dawng tawh a ni, a ti a. Nimina appointment letter semte chu ram tana thawk tura sawmna a nih thu a sawi bawk. Viksit Bharat lam pan tura thalaite kaihhruaina a ni a ti.

<><><>